



Vschinauncha da S-chanf
7525 S-chanf



Radunanza cumünela

Bannida / missiva

per la radunanza cumünela in marculdi, ils 29 marz 2017 a las 20.00 sül palc da la sela polivalenta S-chanf

Stimedas votantas e stimos votants,

La suprastanza cumünela suottametta cotres la bannida e la missiva per la radunanza cumünela dals 29 marz 2017 ed invida amiaivelmaing da piglier part a quella.

Tractandas:

1. Protocol da la radunanza dals 1. favrer 2017*
2. Contrat CEE regard dret d'utilisaziun per büschens da cabels
3. Schlargiamaint dals indrizs per l'alluntanamaint da l'ova persa e pel provedimaint da l'ova potabla Susauna, etappa 2, credit fr. 800'000.00
4. Chantun Grischun, dumanda barat terrain
5. Nouv plan da tir Flab, decisiun da princip
6. Revaisa uorden da god
7. Revaisa ledscha per l'adöver da vias champestras e vias da god cun veiculs a motor*
8. Revaisa ledscha da champagna, pasculs ed alps*
9. Varia

***La documainta per las tractandas sto ad invista/po gnir retratta tar l'administraziun cumünela u es visibla sün l'internet suot: www.s-chanf.ch**

DEUTSCHER TEXT: BÜCHLEIN BITTE UMDREHEN

1. Protocol

Il protocol da la radunanza cumünela dals 1. favrer 2017 po gnir retrat tar l'administraziun cumünela u es visibel sün l'internet suot: www.s-chanf.ch.

2. Contrat CEE regard dret d'utilisaziun per büschens da cabels

Situaziun da partenza:

La Swissgrid ho survgnieu il permiss da la Confederaziun per eriger üna nouva lingia da 380 kV sün las lingias existentas traunter Pradella e La Punt-Chamues-ch. Düraunt l'exposiziun publica haun fat las vschinaunchas da Scuol fin La Punt-Chamues-ch recuors cunter quist proget e dumando differentas compensaziuns economicas. In püs contrats traunter la Swissgrid/CEE/EE/OEE scu eir las vschinaunchas S-chanf e Zernez vegnan regledas quistas compensaziuns. Ün da quist contrats es il contrat traunter la CEE ed ils cumüns Zernez e S-chanf insembel cun la Energia Engiadina. In prüma lingia vain our da vista da la vschinauncha da S-chanf reglo l'utilisaziun cumünaivla dals büschens da cabels chi vegnan fabricchos da l'OEE. Resümand paun gnir installos ed utilisos büschens vöds per fr. 35.00 (lingia d'energia) e per fr. 15.00 impü fr. 4.05 (lingias da communicaziun) per meter currant.


Proposta:

La suprastanza propuona a la radunanza cumünela d'accepter il contrat.

3. Schlargiamaint dals indrizzs per l'allontanamaint da l'ova persa e pel provedimaint da l'ova potabla Susauna, etappa 2, credit fr. 800'000.00

Situaziun da partenza:

Per effectuier l'attach da la chanelisaziun e cun que d'accumplir las pretaisas decretedas da l'an 2013 da la Regenza, s'ho cumanzo l'an 2016 cun la prüm'etappa dal schlargiamaint dals indrizzs per l'allontanamaint da l'ova persa e pel provedimaint da l'ova potabla in Susauna. Per la seguond'etappa chi vain effectueta dal 2017 e chi cumpiglia il trajet Nandet fin Susauna sun previs i'l preventiv 2017 fr. 550'000.00. Tenor offertas inoltredas muntan quels sün fr. 800'000.00. Previs es da cumanzer cul fabricat zieva Pasqua.



Proposta:


La suprastanza propuona a la radunanza cumünela da deliberer il credit ill'otezza da fr. 800'000.00 per pudair continuer cul proget.

4. Chantun Grischun, dumanda barat terrain

Situaziun da partenza:

L'uffizi chantunel da construcziun bassa dumanda a la vschinauncha da S-chanf per ün barat da terrain. Previs es, cha la vschinauncha surlaschess arduond 26m² da la parcella nr. 608 e survgniss arduond 385m² da las parcellas nr. 361 e nr. 362. Uschè pudess gnir construida la via chantunela sün terrain chantunel e la vschinauncha survgniss l'entreda da la via vers Plaun da Senchs.

Plan da situaziun



■ Part da la vschinauncha chi vain surpigliada dal chantun.

Proposta:

La suprastanza propuona a la radunanza cumünela d'accepter il barat da terrain.

5. Nouv plan da tir Flab, decisiun da princip

Cun la refuorma da l'armeda vain müdo darcho sün duos recrutas l'an. Cun quist müdamaint es eir d'adatter il plan da tir da la Flab. Davart da la Confederaziun vain la dumanda chi'd es da princip pussibel, d'adatter il cumanzamaint da la perioda da trer cun muniziun da cumbat düraunt l'utuon

sül principi d'october e na scu fin co davent da la mited d'october. La perioda da trer düraunt la sted nu vain perzieva pü druveda. Per pudair cumanzer cullas trattativas dumanda la suprastanza cumünela a la radunanza üna decisiun da princip.

6. Revaisa uorden da god

Situaziun da partenza:

La cumischiun, chi'd es gnida tschernida da la radunanza dals 24 avrigl 2014 per fer las differentas revisiuns dals tschantamaints, ledschas ed uordens, repassa tuot las ledschas ed uordens cumünels per adatter quels a las ledschas superiuras scu eir als bsögn actuels. Cun repasser l'uorden da god in cooperaziun cun l'uffizi da god chantunel s'ho constato, cha bod tuot ils artichels vegnan reglos in ledschas superiuras. Perque es la cumischiun da l'avis d'abolir l'uorden. Ils artichels na descrits in ledschas superiuras scu l'utilisaziun da laina da fö, descha e bös-chins da Nadel, scu eir las incumbenzas e dovairs dal suprastant dal departamaint dessan gnir reglos in ün reglamaint.

Proposta:

La cumischiun propuona d'abolir l'uorden da god ed elavurer ün reglamaint culs artichels na descrits illas ledschas superiuras.

La suprastanza cumünela sustegna plainamaing la proposta da la cumischiun.

7. Revaisa ledscha per l'adöver da vias champestras e vias da god cun veiculs a motor

Situaziun da partenza:

L'augmaint da l'adöver da vias champestras e vias da god cun veiculs a motor ho do adüna dapü reclamaziuns davart da la populaziun. Tenor la cumischiun per la revaisa da tschantamaints, ledschas ed uordens es la ledscha sufficiainta e fo be adattamaints per preciser la ledscha ed adattescha tela a las otras ledschas cumünelas scu eir las ledschas superiuras. Tenor la cumischiun dessan ils abitants eir in avegnir avoir la pussibilitad d'utiliser las vias culla vignetta u cun ün permiss limito. Ils giavüschs chi sun entros düraunt il temp da cooperaziun davart da la populaziun s'ho eir pudieu resguarder. Scha la ledscha vain executada scu descritta schi's po diminuir il trafic sün vias champestras e vias da god per bainquaunt.

Proposta:

La cumischiun propuona d'accepter la revaisa da la ledscha per l'adöver da vias champestras e vias da god cun veiculs a motor.

Eir quista proposta da la cumischiun sustegna la suprastanza cumünela.

8. Revaisa ledscha da champagna, pasculs ed alps

Situaziun da partenza:

L'agricultura svizra sto avaint immens müdamaints! Ils adattamaints sün champagna, pasculs ed alps nu passan neir tal s-chelin local speravi. Impü s'haun müdedas las structuradas da la populaziun locala, dal turissem e l'esser da chesa ill'agricultura. Perque ho la cumischiun per la revaisa da tschantamaints, ledschas ed uordens elavuro insembel culs uffizis chantunels e la suprastanza cumünela la preschainta revisiun totela.

Proposta:

La cumischiun e la suprastanza propuonan d'accepter la revaisa totela da la ledscha da champagna, pasculs ed alps.

S-chanf, ils 16.03.2017

La suprastanza cumünela

Il president:	G. Largiadèr
L'actuar:	P. Mayer